

Дорвош район вулэң ёх емаң хатл

Хацам лапатаң 13 па 14-мет ай кер тылац хатлати вуды тац шавиты ёх мойц хоятат пилна хув лавлам емаң хатлэд постасэл. Ши вантапса па касапса хар Мужи вош леп Ханты-Мужи куртна дарпилдыса.

Емаң хатл кеша Ханты-Мужи курт пунална, посл па пелакна пухар донц элты сыстамптам. Щита ун вантапса па касапса харт лэцатомат. Тадаң 20 молтас урхот донцям: ши кутан няврэмат хатл сыс шавиты хот, леккар хот па арпелак мойц хоятат кеша лэцатом хотат. Щалта няврэмат кеша ун ёнтапса лот верам. Вулэң ёх ураңна нэман ун палатка донцям, хота рахас хошмалтыгы, лэты па шай йиницты.

Ши тумпина ун тынасты лотат йи юпина омписантамат. Нялгьяң молтас тынасты ёх Россия хон мувев элты ёхатмел. Щалта Ямал мувев доват элты ищи тынасты хоятат пормасдал па лэотгдал алидысат: Мужи, Дорвош, Питдор, Горка вошат па Кев сыл, Ямальской районат элты.

Одаң хатадна алаң элты вулэң ёх кеша собраний верса, хота хацам тац рупата элты потарса: муй арат вуды энмадса, муй арат хорты маса, па холна муй мосад верты рупата верт туңа-цира лэцатты ураңна. Щалта елды, ёх па нэңат касты питсат: лохна хухалсат, тынщаң ёвалдсат,



Хор: muji-inform.ru

Ольга Куртямова (парта пелакан) – «Тус ёш нэ».

ухал шоппи наварсат па юх катна талдман юрацсат. Етна пелка па Мужи вош каш верты хотна ун концерт лэцатса па ар рупитам хоятат мойлаптасаят.

Кимет хатадна, алаң элты емаң хатл елды постаты питса. Олңа, хорамаңа кирам вулэң ухлат эталтысаят – щиты хускем ухал онас иты вантапса хар кутан, дарыман, мантсат.

Ши юпина па ши касты лотат пуншсаят. Посл хоца нэңат па ёх вулэң ухлати лэдамтысат 1600 метра щира. Аратл 26 ухал: 14 – ёх па 12 – нэңат. Щалта ищи щита этнобиатлонна кассат – щит хун дохна хухалдан па тынщаң сува ёвалмадан. Щалта хоттэл ёх кутати эстафета ус. Етна пелка па мет юраң ёх пертацман юрацсат.



Хор: Альбина Тьярлина

Юлия Лонгторгова тынаң мойлапса питас.

Касапсаятан одаң местаят тамиты питсат: Константин Талигин, Вячеслав, Станислав па Эдуард Лонгторговат – дохна хухалдан па тынщаң сува ёвалмадан; Лонгторговы хоттэл ёх – эстафета щирн; Дмитрий Вале́й – пертацман юрацман; Юлия Лонгторгова – нэңат кутан вулэң ухлати лэдамтыман; Эдуард Лонгторгов – ёх кутан вулэң ухлати лэдамтыман; Надежда Талигина – мет хорамаң вулэң ухал; Ольга Куртямова – «Тус ёш нэ».



Хор: Иван Сандрин



Хор: Иван Сандрин

Щиты, мет тынаң мойлапсаят – «Буран. Лидер» нэмпидонцхопат нялмет тац хоца сельскохозяйственное предприятие «Мужевское» Щаня мув пеламантсат.

Иван Сандрин ханшам потар



Хор: Иван Сандрин

Ямал мувев губернатор ясаң китас хоты верат шоши мувевна мандат

Айкер тылац 18-мет хаталн Дмитрий Андреевич Артюхов Ямал мувев депутатата, улты па рупитты хоятат педа ун ясаң китас, хоты хацтам талатн верат мантсат па хоты елды улты номас тайлдув.

Ляля манам ёх кеша

Мет одаң потар манас хоты муң шоши хоятлудв няд талд сыво ляль хоца юрлад пондалдал. Сишн, лув ураңладн па хотгэл ёхлад кеша ар юр верлудв па нётлудв. Аратл 70 молтас нётап верман ул. Тампуш луң элты ялап проект пуншда – «Своих не бросаем». Шци щирн ляльн улам хотгэл ёх кеша Россия хон мувев доват каш вер па сютчапса лэцатда. Шци тумпина ляля яңхам ёх педа нётап туты питалд нэман понам хоят – Артур Жумабаев.

Ялап хот омасты верат

Кашц хоята мосалд ям па хошам хот. Шци щирн округ доватан катра, дыйм хотат нох лосатдайт па ун хорам хотат этлат. Тунял 1 миллион квадратной метра ялап хотат улты масаят. Ин па ялпа номас понтсув – па ялпа миллион квадратной метра хотат лэцатлудв. Ин Ямал мувев доватна 227 ялап хот омасты питса. Ялап программайт этсат – «Жилищный капитал молодой семье» па «Арктическая ипотека».

Юшат яммалты верат элты

Тампуш округ доватна муң дытлаюв соткем арат километра юшат яммалты. Ин там луңан мет ун мосты юшев Пулцават элты Надым унты верты етшапталэв. Па иса ям, пайды юш элты яңхты питлудв. Шцалта, Пулцаватна, тампуш ялап аэропорт омасты питла. Шци тохлаңхопат кеша лэцатом хот мет уна йилд па аршак хоят холта рахл тутлиты.

Сыстам йиңк па хошам хотат

Тунял талд 30 километра теплотрассаят яммалдсаят. Шцалта ялап газовый котельныйят Ляпатнаңк, Тазовской, Тарко-Сале па Толька нэмпи вошатн версаят. Новый Уренгой вошан 2 котельный яммалдса. Тамац рупата мосал кашц талд яма верты. Тампуш талэв лапат тылд сыво мет ищки ус.

Ялап, йиңк сыстапты хотат этсат Яр-Сале, Панаевск, Правохеттинский, Тазовской, Мыс Каменной, Тарко-Сале, Надым па Ляпатнаңк вошатн. Тампуш Салемалн па Ныдаян шци рупатайлудв етшапталудв, папуш па Пангоды хоца.

Донбасс мува нётлудв

Тунял Авдеевка вош яммалдсэв, тампуш па Волноваха хоца вошхулэт па хотат лэцатлудв. Шци тумпина Волаң ляль 16 памятник ар куртатн нох версалудв. Шцалта Свято-Успенской Николо-Васильевской монастырь Никольское нэмпи вош хоца яңхас. Шци поп-хот атом солтанатн орытам па тутна ёсам. Тампуш элты лувелд нох лэцатты питлэв.

Шоши шимдаң мир хоятлудв ураңна

Тунял хорты маты нёха тынд элатсэв. Сишн, тампуш вулэң ёх аршак шоши нёха маты питсат. Шциты, тампуш муң шеңк ар нёха лэцатсув – 3 щёрс 300 тонна.

Луңан па Сергей Миронович Ямкин рупитты ёхлад пидн велпаслаты панат па куртат хоца яңхас. Шци элты ялап нётап этас – велпаслаты хотгэл ёх кеша 2 спасательной



Хор: Фёдор Воронов

ЯНАО губернатор Д.А.Артюхов ялап верат элты.

жилет мада, тутыйиңк лутты ох 7 щёрс элты 12 щёрс солдува унты элатса па тут машина лутты ураңна ин 30 щёрс солдува ёхды мада.

Холна елды ар рупата мосалд верты: уталтыты вер, ай куртатан рупата харт лэцатты па ялап хотат мослат верты.

Няврэмлудв кеша

Ямал мувев доватна муң иса няврэмлудв кеша худмет талд ям ашкудайт верлудв, хатл сыво шакты хотат яммалудв. Шциты муң Новый Уренгой, Ляпатнаңк, Муравленко, Мужи па Харампур вошатн ашкудайт яммалсув. Губкинской вошан ялап ашкуда омассув. Гыда вошн няврэмат улты кимет хот ашкуда-интернатан версув. Холна ар ялап ашкуда па хатл сыво няврэмат шавиты хотат ялпа верты питлудв. Шци тумпина ашкуда няврэмлудва мосалд елды уталтыты, сишн колледжат хоца аршак рупитты щират верлудв. Ямал мувева рупитты ошаң хоятат шеңк мослат.

Елды улапса тумтака туты мосалд

Муң мувевна ар ай няврэмат сэма питлат. Россия хон мувев доватна муң шци щирн худмет местайн уллудв. Хотгэл ёх хоятлудв аршака йилат. Шцит шеңк ям. Сишн, тампуш элты муң семьяята хота 3-мет няврэм сэма питалд 1 миллион солдува ох маты питлудв.

Тумтак улты ураңна муң ар леккар хотат верлудв: 5 талд сыво 14 ялап больница омассув, 84 – яммалсув, па ай куртатан 28 донцсув. Ин па тампуш холна ялап леккар хотат верты питлудв. Шци урца ошаң ун леккарат кашц больница рупитты вохлудв. Ат Ямал мувевна хоятат тумтака улдат!

Иван Сандрин ханшам потар

– Муңев щимац поддержка верас губернаторэв Дмитрий Артюхов, малаян масаятна алаң олаңна, хунты йилдан няврэм тайты хатна амые элты па щит нэмад «Ямальской матери». Шци юпина юхы манта питы порайна няврэмиен ищци мала масаятна «Малышу Ямала» нэмад. Шцит век ям верат, мув сеңк ям, хунты мув ханты кадаң ныңлудв ор хат эвалт йитэдна, лувилалд век ям анты, – ясталд ар няврэм тайты амые Яна Максимовна Тайпина Охсарка вош элты.



Хор: Фаина Кабулова

Ассоциация «Ямал потомкам!» рупата щирн уйтантысат



Айкер тыдащ 16-мет хатадн Яр-Сале вош Ямальской районан Координационный совет лэщатыса. Тохи Ямал мувев шоши шимдаң рут мир ёх департамент элты купца нэ па ёхтыдыяс.

– Тамхатл, ин шоши шимдаң рут мир хоятлуд кеша, морткем арат нётап верман ул, лув нэмл – «дорожная карта по улучшению благостояния КМНС ЯНАО». Щи щирн 6 раздел уд па 33 нётты вер. Нётап отат, арпелак щи хоятлува верман удлат, хойтат вулы тащ хотатан яңхлат па хул велман удлат, – Ульяна Алексеевна Каленюк ястат. – Тунял хул велпасты куртат па панат хуват яңхсув. Худантсув хул велты па куртаң хоятлуд инщасув, муйн холна рахал нётты. Щишн, тампуш ялап тал тыдащ элты муң щи нётап пормаслуд еша эдатсув:

велпаслаты хоттэд ёх кеша 2 спасательной жилет мада, тутыйиңк лутты ох 7 щёрс элты 12 щёрс солдува унты эдатса па тут машина лутты ураңна ин 30 щёрс солдува ёхлы мада.

«Ямал – потомкам!» куца ху – Эдуард Хабэчевич Яунгад потартас хоты 2025 талн рупата манас: «Хашам талн муң хоцаев Ямал мувев элты ветсот молтас письмо ёхтас, щилта лапатъяң Пулцавта, хашам отлаң иса районатан улты филиаллува па вошан тайты представительство хоца. Иса ханшам письмаят рупатая вуслуд, па ёхлы ханшсув хоты па муй мосал верты. Хота па нётсув нэпекат



Хор: Эдуард Яунгад



туңа-щира лэщаты, хота мосас охна нётсув, энамты шоши няврэмлуд касты китыдыслуд».

Холна тампуш «Ямал – потомкам!» сахат рахал пошкан нэпек сахат йиты ох ёхлы сохаттаты. Щи-мащ нётопса нэман верман ул вулэң ёх па хул велпасты ёх кеша. Пошкан нэпек моцатты ураңна мосал ун вошата (Надым, Новый Уренгой, Тарко-Сале) яңхты: леккаратн вантам, манты юш, ат сыс щутцаты хот па учебный центр хоца посатам охат рахал ёхлы вуты. Иса муй элты пэпекат мослат ияха акатты па Ассоциация хоца заявления ханшты, щи щирн верытла аратл 50-кем щёрс солдува ёхлы маты. Тампуш ёх Ямальской, па Кев сыл районат щи щирн уталтысат. Хой пошкан нэпек ант тайл, сорапак лэщататы!

Иван Сандрин ханшам потар

«Тыдащ поры» Ёмвошн верса

(Олаң шупал № 11 луңтадан)

Щиңанща вошаң хоятат емаң хатлэда актацты кутн муң шоши мир Югра мув закон щирн давалты нэ Людмила Алфёрова пилн уйтантысув па ищиты потрэмасув. Лув там «Тыдащ поры» емаң хатл ураңан тамиты щи ястыдыйс:

– Муң йисаң-нуптаң хоятлуд пилн кашң пуш иса ияха номпсат лэщатсув, муй хораспи емаң хатлат муңева порылдыты рахал па муйсыр отлуд емаңа тайты мосал. Имолтыйн пирац ёхлуд-нэңлуд щиты потарсат, хоты «Тыдащ поры» – щит шеңк мосты емаң хатл. Лувел кашң талн порылдыты муңева рахал. Щи порайн анта туп муң хоятлуд, сыр-сыр миратн щи емаң хатл ищиты мосман тайты питла.

Щалта «Тыдащ поры» емаң хатла актащам вошаң ёхлуд-нэңлуд елпийн Асугорской «Хатдые» нэмпи театр шеңк хорамаң вантопса верас, мата отэдн япсыена вантсат, муй щирн тыдащ икев там нови туром илпийн тыйс. Муй иты лув мет олаңан ус, мата тахаята катра яңхас, муй хораспи нэңат пилн уйтантыйс па муй щирн туром нумпия нох питас. Хун па тамац ун вантопса сохнаптаса, «лонщаң пасан» елпийн йисаң-нуптаң ёхлуд тыдащ ики пела пойкацсат. Лув там егнайн тумтак улапса щир дыеда вохсат, лулан хулвой велпас муй вулы давалты вердал туңа-щира елды ат мантсат.

Мет ёхи хашам кутн вошаң хоятат там «Тыдащ порыйн» порылдыым лэтотат дэсат па каврам шай йинщсат. Кашң ай па ун хоята там емаң хатл умща ус.

Владимир Енов ханшам потар

ОБЪЯВЛЕНИЕ

Там QR-код хуват доңаты па вантаты, муйсыр нётопсайт СВО хоца улты мохета мадайт. Щи тумпийн нэңлала, няврэмлала, аңкилала па ащилала ищи нётопса вуты рахал.



СЛУЖБА ПО КОНТРАКТУ В ВС РФ

ПОЛНАЯ ИНФОРМАЦИЯ ПО ТЕЛЕФОНУ
+7 (902) 816-11-90
+7 (34922) 3-98-08
ЗВОНОК ПО РОССИИ БЕСПЛАТНЫЙ

ВРЕМЯ ДЛЯ ВАЖНЫХ РЕШЕНИЙ!

КОНТРАКТНАЯ СЛУЖБА 6 700 000 Р

ЕДИНОВРЕМЕННАЯ ВЫПЛАТА 4 000 000 Р

ПРИ ЗАКЛЮЧЕНИИ КОНТРАКТА НА ЯМАЛЕ

Обучение:
✓ ОПЕРАТОРОВ БЕСПИЛОТНЫХ ЛЕТАТЕЛЬНЫХ АППАРАТОВ
✓ ТАКТИЧЕСКАЯ БОЕВАЯ
✓ МЕДИЦИНСКАЯ ПОДГОТОВКА

3 600 000 Р ЕДИНОВРЕМЕННО ОТ РЕГИОНА
до 120 000 Р СЕРТИФИКАТ НА РЕАБИЛИТАЦИЮ

400 000 Р МИНИСТЕРСТВО ОБОРОНЫ
ЗАКЛЮЧЕНИЕ ВОЕННОГО СОЦИАЛЬНОГО КОНТРАКТА

ЕЖЕМЕСЯЧНЫЕ ВЫПЛАТЫ ПРИ НАХОЖДЕНИИ В ЗОНЕ СВО ОТ 225 Т. Р

Сорапак айкед моцатты ураңан

«Лух Авт» газета кашң лапат йи пуш элдыйл. Тухал ишан, ёхаттал унты талаң лапат хашал. Щи веран, сорапак айкедат моцатты ураңан, нынан мосал «Лух Авт» понылдыты айкедат «ВКонтакте» па «Одноклассники» хоца моцаттыты.

Щи ураңан там QR-код мохты доңаты, па муң верылдыты айкедлува ханшлтыяты. Кимет веран, айкед луңатты тумпийн, щита рахал ясаң ханшты, потран сама ки рахас – пос понты.

Муң па, нын вантам айкедлан элты ищи нопсэв тыел-тохел понылдылэв, вантлэв – мата айкедат па муй элты хоятат луңатты лаңхалат.

Тумтак ёшна, тумтак курна ханты мир улапсаев ияха понаман елды тулэв, ханты мир ясең шавилэв!





Хорасаң па каркам нэңиет, апраң



Вулэң ёх кеша верам уйтантопсайт

Олаң хатадан алаңсахат элты вулы тащан яңхты хоятат Лорвош район куся Олег Николаевич Попов, Мужи па Горка вошңан совхоз кусяйңан пидан уйтантысат.

Там тада постама вердал элты, Горковской совхоз куся Руслан Георгиевич Саенко потар тус. Яма рупитты па юбилей хатлат постама хоятлад ям ясаңан ястасды па охан мойлаптасды.

Емаң хатадңанан йи вулы хотан леккарат рупитсат. Хоятат тохи лоңемисат: давление вантсат, саккарэд арталаты ураңан вур масат. Араталан хольмаңкем хоят вантса.

Си тумпийн вулы ёх пидан уйтантопсайт верман усат. Молты атом ки вулы хотан, юшан хоят пидан китыйс – муй си порайн верты мосал, потарсайт па альсайт.



Муй хорпи нётопсайт ханты энамты ёх ураңан лэсятман уллат, муй хорпи нэпекат мосмитлат, шоши мир ёх департамантан рупитты ху Алексей Лонгортвов ясаң верас.

Тынасты харат ларпитысайт

Тынасты харата ёхтыдыйм хоятат мосты пормас, худ, вонсямот лутсат. Тасяң яңхты нэңиет хорам охшаматан, ольпаң щашканатан ёрн хирлад тэкаптасдал. Емаң хатлатан улам хоятат лутам лэоттлад ураңан сохаттам охдал, СВО хося улты хоятлува акатсайт. Лапатъяң сёрс содкувая хойс.

Тус ёшаң нэңат

Олаң хатадан «Тус ёшаң нэңат» касапсайн хулам нэ ханты улапсаев эталтысат: ёнтам сохдал, тайты пормасдал, тащан муван мийм лэоттат лэсятсат, улапсаед элты потар тусат. Си касапсайн Ольга Валерьевна Куртямова нох питас.



Хасям лапатаң ханты хоятат ёх емаң хатла ёхтыдысат. Лоң лепан яха актасисат, рутлад, лскем вулы хот лонсилдысат. Ем хоятат вулы хота лоңемисат, тлэотот умасьдысат, эталтыты хо

Етан, Мужи каш верты хотан, хасям тадан мет ямашак рупитам тащан ёх, сэма питам хатлат постама уна пелка ювам хоятат па олаң хатадан касты харатан нох питам хоятат касьтасайт.

Мойң хоятат ёхтыдысат

Кашң тал хон мувев элты мойң хоятат ёхтыдылат. Ки мет тал Волноваха элты няврэмат тутдысайт. Эвет па похат хорам емаң хатл вантсат, вулэң ухадан навралтсайт, хорам хор версат.

Тампуш холна голландский блогер Махил Снейп ийимел па похнадал пидан емаң хатла вохилдысайт. Лув яңкем тал Москва вошан ул. Округева худмет пуш ёхтыдыйл. Луңан округ кусяев пидан Николай Витальевич Озелов вулы хотан хулам хатл усңан.

Касты харатан юрлад арталасат

Кат хатл сус касапсайт мантсат. Ёх хоятат кутладан юрасьсат. Энамты ёх многоборье сирн кассат. Олаң пуш ашкудайн уталтыты эвет па похат юрлад арталасат.

Энамты ёх касапсайдал СВО хося антома ювам Артём Пу-



Хор: Альбина Тырлина

па юраң ёх хоятат яха ёхтыдысат

Мет ольпаң па хорамаң вуды Җорвош район Ханты-Мужи курт кушаслаң пидан уйтанысат, хураң хатаднанан куртаң па мойңацаң ёх улапса вантсат, эплан хорам сохат, касапсайт вантсат.

гурчина постасэд. Тампуш мет юраңшак Владислав Лонгортов ус. Одаң хатадан, каш манам порайн, Җорвош кусяйн мойлаптаса.

Вуды ухадан навралтыты касапсайн нядхосьяң ёх хоят па катхосьяң нэ касас. Мет апрашак Эдуард Лонгортов па Юлия Лонгортова усан, одаң тахая этсаңан, донщопқан шитсаңан.

Пертысыман тампуш мет юраң Дмитрий Валеј ус, хурамсот сёрс содкува ёша пайтас. Кашң касапсайн нох питам ун хоятат, энамты ёх па няврэмат мойлаптасайт.

Мет ольпаң касапсайт

Кимет хатадан хатл шупан вудэң ёх емаң хатл пуншса. «Аргиш Ямала», «Няр нёхи», «Няр худ», «Кавартам ханты лэтот», «Ханты сох» касапсайт мантсат.

«Аргиш Ямала» касапсайн хус вуды ухад эталтыса. Кашң порайн нэ ухлат мет хорамаңа, ольпаңа лэсятдайт, няврэмием ухда опсалтыдайт.

Худмет тал ай няврэмием кеша «Мурах» нэмпидик рупитас. Хатл сыс хутъяңкем няврэм тохи тутдыса.

Ханты хоятлуд хорамаңа ёнтам сохдал, вайдал, туса верам антапкелдал эталтысат. Мет

хорам нэңат, ёх хоятат па няврэмат сценая вохилдысайт.

Няр нёхи, няр худ нёхарты па ханты лэтот эталтыты харата мет ар хоят ёхтыдыйс. Нийл курт элты касты хоттэлат тусдал альсат. Ходна кат сёс сыс касты хоятата ханты лэтот каварты мосас. Хой худ, хой вуды нёхи, хой па тохлаң вой элты лэтот лэсятса, тасяң пасан опсыдыйс. Кашң хоят эплан лэтот умасьдыты верытас.

Няр худ касапсайн одаң тахая Горка вош Русмиленко хоттэд этас. Няр нёхи нёхарман, Катра Киеват Сандрин хоттэд одаң места ус. Шияноват хоттэд Җорвош курт элты мет эплан лэтот каварсат. Ходна специальной мойлапса – кешидота пидан шитсат.

Ой тайты ёх мойлаптаса

Кат хатл сыс емаң хатла ёхтыдыйм хоятат па ар хорпидотасятан, мастер-классатан, лотерея хося пидтасьты верытсат. Дмитрий Миляхов

Мужи вош элты ой таймал, лотерея хося мотоснегодат шитас.

Мет хорам китам хор па мет ар лайк шитам хоятат элты Валентина Озелова пирьса. Җув па мойлаптаса. Кашң вератты харатан, касапсаятан няврэмием па ун хоятат молты шитсат.

Ханты-Мужийн «Живун» парк-музей хося па вератты харат рупитсат. Ёмвош Дом ремёсел хот па Свердловской область Ёква курт элты вератты хоятат ёхтыдысат, мастер-классат альсат, ар хорпидотасятан версат. Екатеринбург вош элты хор ханшты ху хорам мувев па ханты сохаң хоятат хора ханшас.

Емаң хатаднан сора манаспаңан па етшаспаңан. Тац хотан яңхты хоятлуд папуш емаң хатл унты улты тахайдала касалдат, вудыдал елды шавиты питлат.

Тынаң ханты хоятылуд, тумтака, веськата удаты! Нын онтасан ханты мир улапсаев елды манал. Ияха лувел шавиман тайлэв, ясеңев елды тулэв.



Хор: Альбина Тырлина

Дохан яма хататлиты эви

Тунял Дорвош районэм элты Ёмвоша уталтыты щира ёхтам эви Алёна Аляба пилн уйтантсам. Лув Югорской государственной университет «Физическая культура» факультетн 4-мет курсан уталтыйл. Ма лув пилэди потарсам.

Алёна ястас, лув 2002-мет талн Ас халты тыдащ 10-мет хатадан Дорвош район Мужикуртан Владимир Степанович па Татьяна Владимировна Аляба хотн сэма питас. Аньтед ханты Озелов рут элты йил. Ащел худ велпаслас, аньтед хатл сыс ай няврэмат тайты хотн ай воспитателя рупитл. Лув семьяелн худам няврэм сэма питсат: Алёна – мет ун эви, щалта Вадим па Полина. Вадим Пулцаватан медколледж етшптас, Пулцават вошн реабилитационной тахайн рупитас, ин па солтана манас. Полина ащел хутмет классан уталтыйл. Ащел антома йис, щипш няврэмат айтэдн аньтеда нётсат.



Алёна Аляба рутэл элты айкел тус:

– Аляба рутэм Дорвош район Ёханкурт элты йил. Щи курт Войкар Кев ёхан хонаңан омасл. Опрацем вулы тащ давлас. Щалта щутщаты манмалн щацем пилн куртан худ велпасламан ус. Лын ар няврэм тайсаңан. Муң кашщ щутщаты порайн лын пилалн Кев хоңа па ёхлы касалсув, нётсув, щипш вулэт давалты вер яма тайдэв. Ин муң яев вулы тащ пилн касдал. Манэма айтэдн луң порайн Кев шоппи касалты шеңк умащ ус, ванты, щип порайн Кевев шеңк хорамаң!

Аляба рутэм элты потартты ки, муң тус верантты ёх тайлуд, и уйтаң хоят – щит Сергей Валерьевич Аляба. Ловат элты арсыр хорамаң пормасат верты ху. Муң Аляба рутэв хоңа худ велпаслаты, вулы тащ давалты, верантты па па хоятат улдат.

Алёна Ващъёханов куртаң ашкудайн уталтыяс. Щита рут ханты ясаңа Надежда Степановна Аляба лувел уталтас. Ашкудайн лув литература урок самаңа тайсалды, хорамаң потрат ханшас. Щиты ястас:

– Руц ясаңа па литературая уталтаты нэемн ма ван кутн ишаксайм, матты ки, ма по-



Хор: Людмила Шульгина

трат туса ханшдам па лудн елды щип вера ат уталтысам. Елпи экономиста уталтыты номас тайсам. Ма ньем Елена Владимировна Сибарева (Озелова) – Ямал мувн уйтаң тележурналист нэ, лув шеңк лаңхас, лудн ма ищип айкелат акатты нэңа ат уталтысам. Туп ма юраңа-щёмаңа йиты уталтаты нэңа уталтыдам. Нэпекем щирн, ма няврэмат касты туризма уталтаты питдам. Ма, ванты, ашкудайн ищип касты туризм вер мосты тайсам, ван кутн Кева яңхилдысув. Ин там пора унты касдам. Щип тумпийн ван кутн дохан хататлидам.

Алёна ханты семьяйн энмас, вулы тащ пилн каслас, щипш ханты мир улапса яма уйтал. Потартал:

– Ханты семьяйн энампсам, щипш уйтдам, муй рахл, муй анта. Тамхатл духаслама муң улапсаев элты хордам муй па ай кинайт альдам, дыведа шеңк умащ, муй щирн муң нюки хотн улдув, муй щирн вулы



тащ пилн касалдув, муй хорпи хорамаң аня лыптаң Кев мувем луң порайн.

Ма айтэдн щащема нётсам – хот рупатайт версам, кеплат таталсам, ёнтсам, сак элты арсыр сак кедат версам, ин кум ант тайдам, туп щип верат нумладам – туп олңитдам ки, ёшңалам имохты верты питлаңан. Ёмвошн ма ван кутн арсыр верантты харата яңхилдыдам. Ту-

нял сусн «Торум Маа» музейн уталтыты харн усам па Галина Токчевна Шиянова пилн вулы сох таталсам, щалта ванщсам па тутщаң хир ёнтсам. Ма аньтем па лув опилад ищип холдыена ими верат верты хошлат, ванщаслат, ёнтлат, сэвлат, сак каратман арсыр хорамаң сак кедат па па отат вердат.

Ёмвошев па уталтыты тахаел элты Алёна щиты ястал:

– Ёмвоша уталтыты ёхатмемн ма имохты оша пайтсэм, муйсыр хорамаң па там йис щирн верам вош, муйкем ун Югорской государственной университет. Манэма тата шеңк умащ уталтыты. Ма ялап пилнэңдам пилн уйтантсам. Елды магистратура хоңа уталтыты номас тайдам.

Щимащ ям ханты эви пилн уйтантсам. Луведа ям ясаңат китдам: елды яма па туса ат уталтыйл, муйсыр ям номпсат тайл – лув улапсаелн ат тыйлат! Талаң ёш, талаң кур наңена, Алёна!

Людмила Шульгина
ханшам потар

Љаңки Тэпал

Љаңки Тэпал лэңки Хатад ещад хонша олад. Хонша олтал элты Хатадна хонл мохты кутарласа. Хатл хоца манал па Хатл педа потартал:

– Ма хонша олсам, хонэм мохты кутарласа. Наң муй ши доват у-ун?

– Ма ал ун. Ма ки ун антом, мув хун хошмал! – Хатл ястал.

– Ши доват ун ки, Палаң лэр этмал, лап холты суктадайн? – Љаңки Тэпал нюхмал.

– Палаң хотащ кепа ун, – Хатл ястал.

Щалта Љаңки Тэпал Палаң хоца манал па инщасал:

– Палаң, наң муй яна ун?

– Ма, таңха ун, – Палаң потарл.

– Ай вот руви тыйл, ел холты податдайн? – Љаңки Тэпал ел ши нюхмал.

– Вот рув, мосаң, ун, – Палаң ястал.

Елды, Вот хося манал па лув педайл ястал:

– Наң яна ун?

– Ал, таңха, ун, – Вот ёхды ястал.

– Тум Щарас путарна улты Хомащ Кев шуп полтты верытлэн?!

– Љаңки Тэпал ястал.

Ин Вотэн ши подал, ши подал. Хомащ Кев шупал нэмолты щиран ант шитдалды па ястал:

– Хомащ Кев шуп, илампа, ма элтэм юраң.

Љаңки Тэпал Хомащ Кев шуп хоца манал:

– Хомащ Кев шуп, наң яна ун?

– Йи шупем мува ил шуйлас, яна, хотащ кепа, ун, – Хомащ Кев шуп ястал.

– Ши доватна ун ки Сосл Юрна мохты холты пордайн? – ин отэн ел нюхмал.

– Сосл Юр ун, таңха? – Хомащ Кев шуп инщасл.

Љаңки Тэпал Сосл Юр хоца манал:

– Сосл Юр, наң муй яна ун?

– Хотась кепа ун, – ин икел ёхды ястал.

– Ханты ху тайты Акарна порэмадайн, кат олден восиман холты яңхал? – Љаңки Тэпал елды инщасл.

– Ханты ху тайты Акар ун, мосаң? – Сосл Юр ястал.

Љаңки Тэпал Ханты ху тайты Акар хоца манал:

– Ханты ху тайты Акар, наң муй яна ун?

– Мосаң ун! – Акар увадал.

– Ханты хуна хачадайн па пеңклан муя ил ханятдалдан? – Љаңки Тэпал няхидыял.

– Ханты ху, илампа, ун, – Акар ястал.

Љаңки Тэпал Ханты ху хоца манал:

– Ханты ху, наң муй яна ун?

– Ма ки ун антом, муй арат вер холща тыйл? – Ханты ху ёхды ястал.


– Наң ши доват юр ки тут султам элты муя нох дойплан?

Тут хоца манал:

– Тут ими, наң яна ун?

– Ма яна ши ун? Тут куртам от антом, – Тут нюхмал.

– Па наң ши доватна ки ун, Палаң элты ерт сёпатыгалад муя йи тут сэмен ант



– Ма тата мет юраң!

– Я тут всех сильнее!



Туп дый хасяс


Только хвост остался



– Ма хонша олсам, хонэм мохты кутарласа. Хатл, наң муй ши доват ун?


– Ты почему мой живот поджарило?

Солнце, ты наверное, на свете всех сильнее?





Палаң лэрн лап суктадайн!

А тучка тебя закроет!



– Палаң, наң муй яна ун?

– Туча, ты на свете всех сильней!



– Вот рув, наң щимащ юраң ки Хомащ Кев шуп полты!

– Ветер, если ты такой сильный, то сдуй с места береговой утёс!



Нэмолты ант ястас Йиңк, туп ун хомп вуты ларэмас, Љаңки Тэпал нык лэхемаса. Ин там унты таңха, Щарас Йиңк луман ул.

Ничего не ответила вода, набежала большой волной и утащила Беличий желудок в свои глубины. Наверное, до сих пор он там и живёт.

хащал. Йиңк, илампа, наң элтэн юраң? – Љаңки Тэпал ястал.

Љаңки Тэпал Щарас питара манас:

– Щарас Йиңк, там мув доватан наң мет юраң?

Нэмолты ант ястас Щарас Йиңк. Ши куман Щарас элты Ун Хомп вуты ларэмас, Љаңки Тэпал нык лэхемаса. Ин там унты холща Щарас луман, таңха, ул. Ши.

Роман Григорьевич Кельчин монцас, Иван Сандрин нэпека ханшсалды.



СУРГУТСКИЙ
ДИАЛЕКТ

Сәмләх-пәлләх пырәс ИКИХӘН-ИМИХӘН

(Олаң шупал № 11 луңталн)

Ту сәх пән ивәл әй мөч. Мунт ту молқатәл йасәң қул, өс пупи вохәл. Өс мустәмин йаңк ти вәр, вөйәң һәви пулта қөрасәп йаңк ти вәр. Йа тақа, ту қота йөвәтмала ләйләхәл: әй тәхәнә най муләмин төп-төп пәр кил-әтәл.

Һатәликкә әй кәтәлнат өв-пи пунчәх, әй кәтәлнат өвпи тәвәртәх. Чүч өвтыяа тәхә ымәл. Мунт ту мүрт вултәх, мүв мүртнә наркасләхән, ту мүртнә ти йөвәт. Йа тақа, әй латнә усипәхләхән, һәрпәхләхән.

Ики һәвмил:

- Ими, вәлэ лита йәхән?
- Тақа, - йастәл, - йәхәм.

Ики һәвмил:

- Мампә лита йәхәм. Молқатәл вәлэ қөләм оли күрәң войәх күч вохәлмән, әйнам вәли мәнәм чәпас. Мүв урнам қәлат әнтә қәлат әвләмән. Йа тақа, тәм қәтәл пупи вохләмән. Нүч тәм әвләмән. Тут йа вөйәң-лантәң өт, пупи вохләмән. Пупи - вәлэ вөйәң өт.

Йа тақа иминам йастәл:

- Өңқйух тәвләк вәтимтә!

Иминә өңқйух тәвләк вәтимты.

- Аңтәпа нөқнам китлэ!

Аңтәп қот қөннам иминә нөқнам китли. Ики наркасләта ти йәх:

- Қөләм оли-йа пупи, тәхә рөмәса-а, тәхә қөмәса-а!

Тақа вотәң-пәләң пәвәттә ләви, тәтың-пәләң пәвәттә ләви пупи тақа вотнә әй сөңнам аләмли, имиҳән-икихән қот қөн йәчәнам. Ту төрәм пәтәнә ләхәлтәли. Пупи йүв, йүв, имиҳән-икихән қот қөн йәчәнә, аңтәп тәй йәчәнә әй пуш вәрәнты. Пупи қот пәлә йәчи тәт лярәмты. Молқатәл вәлэ вәр вүйәм қө, лүв пә пыхәртәл. Пупи қөртә қө лүв пә чүксәмәх. Ит вәлэ көчәх үч йөта алтахә йәх. Вәр әйнам вута йәх.

Тақа ту пупи қөри-вәри, панә ту лапәт пәлнәп, қут пәлнәп әнәл сор тәхә намән лойәлхәл, әйнам тәх мөли пупи. Пупи һәви кәвәртәм-вәрәм пырнә панә тақа ту вөйәң һәви лүвнә йаңк тәттәхә қәлат ти кәритәтәх. Молта мүв вөли, әнәл йаңк лүв вәр. Тәттә қәлат вөйәң һәвит әйнам тәхә пуллал. Тақа ту ливмил, йәһтмил



Хор: Альбина Тырмина

пырнә лүв пә лил, қочәм йәңкәл сунқәлнат әйнам йиһтәл. Кәв пут пәтәнә әймәтли пә әнтә қыт.

- Вәлэ, - ики һәвмиләл, - нүң әвлән?

- Әнта, мүв тохәм әвләм? - ими һәвмиләл, - әнтә әвләм.

- Әнта, тит қәлнә тит тәнә? Тит мүв урнам әнтә әвләмән? - йоққән тақа айа-көла ти йәккән. Қәлнә ахән һәлчихтәтә тохән пә әнтәм вөл.

- Тит тән сохит мин үрәккә-мәхәлхә мин әнтә әвәлләмән?

- Ики айа-көла иминам йәх. -Тит қәлнә вотләх мөта урнам мин әсәккә йәхмимәнә әнтә әвәлләмән, - ики һәвмиләл. - Аңта тит тәм вәлтүмәнә мөтанә ләйхәлтәлөймән. Сәмләх-пәлләх йәхмимәнә мин мөтанә ал ләйхәлтәлөймән. Қәлнә тит мол қөләм оли вәли қор вухмән, әнтә әвәлмән. Молқатәл қөләм оли күрәң войәх вухмән, әнтә әвәлмән. Тәм қәтәл қөләм оли пупи вухмән, әнтә әвәлмән. Ими, нүң мол тиминт йасәң нөқ әтәлтән, ма ихнам мүват һәлчәхты. Ту пырнә өс ма ихнам мөтанә һәлчәхты, ти мөтанә ал ләйхәлтәлөймән? Әнта,

- ики һәвмиләл, - нөмлэ, моқи йәхләл, йоқлал ливмимән латнә ти ими қоләхсәхән қытхән. Тақа ти ими қоләх вәлэ қөхә, қө лөвәт қөхә йәх. Әнтә ти қөнә мөта ур ал вәрәнтәл?

Ими һәвмиләл:

- Кәш-әй, чопәңқа! Тит вәлэ мин ай латнә қыйтәмән, чәңкәлтә вәртә йәх қунтә, титмән мөтә вәр ал вәрәнтәл.

- Тақа қәлтахәл сәр титхән тәхә вохлихән, - ики һәвмиләл.

- Қәнтәқ қө һәви ливмимән пә қөққә йәх. Титхән вохләмтәм. Қәнтәқ қө һәвин мин моқи йә-мат әвәлтә вәр тәйләмән, панә қәлтахәл титты ту вохләмән.

Пәттәқ шөртү! Өс мөта аңкинә ими ахән һәлчәхтәтә, айәлта тақ ту йасәң қөлмал пырнә кәмнам ти мән. Әй кәтәлнат өвпи пунчәх, әй кәтәлнат тәвәртәх, панә йә-қәнам ти нүрәхтәх, пупи һәви кәрәлнат. Ими моқла киһта өс пытәмтәхәлта йәх. Үлпәл-қөрәл әнтәм.

- Нүң чәйә пәта, қәлнам йәңқлән? Нүң тәм қәл вәтә һәвилә?

Иминам һәвмиләл:

- Айләх, сүйләх ливәлэ, ливәлэ! Нүңаты йастәләм, лива!

Тақа омәстал-вәлтәл лота әнтә қөнәл ту ими қоләх. «Өс тәми мөтапә төрәм, - өнтәлнә нөмәқсәл, - қәлтахил вәлэ ти, аңтәп тәйа ти вәрлөймән». Ту имиҳән-икихән һәвмәм сөңнам тәхнам қәләнтәх, қәлтахил тәм йәчәң қәтәл йәчәнә, сәмәң қәтәл сәмәңнә там ими қоләхсәхән тәхә вохлихән. «Аләң там ими қоләх вохләм, ту әнәл қөхә йәх. Там ту пырнә имил».

Ими күрһәхләх, мөтләх мөта вәрәл мулстәләх қәлат йәх. Имил йастәл:

- Нүң қәлнам йәңқлән, сәх пәнә мүват әнтә лөтилэ?

- Сәх пәнәм кәш қул әйнам әнтә тайал.

Йа, аләң вәнчана, пөчана қәтәл, иминам һәвмиләл:

- Пөңәл вәлэ йәч әнәл кәв қәттә? Ту әнәл кәвлиңқи мантәм мосәл.

(Еллы па ул)

Аграфәна Сопочина
ханшәллы

Газета

«ЛУХ АВТ»

Адрес редакции:
629003, ЯНАО,
г.Салехард,
мкр. Богдана Кнунянца,
д. 1, каб. 106
+7 (34922) 4-68-63

E-mail:
luh.avt@yamal-media.ru

Учредитель

Департамент внутренней политики
Ямало-Ненецкого автономного округа
(629008, ЯНАО, г.Салехард, пр-кт Молодёжи,
д. 9, каб. 708)

Газета зарегистрирована

Управлением федеральной службы по надзору
в сфере связи, информационных технологий
и массовых коммуникаций по Тюменской
области, ХМАО-Югре и ЯНАО
19 апреля 2012 года
Регистрационный ПИ № ТУ72-00558

Тираж 1300 Заказ 76 тз

Подписные индексы:
на год - ПА700, на полугодие - ПР561

№ 12 (1315)

Газета вышла в свет 21 марта 2026г.

Подписано в печать 19 марта 2026г.

по графику: 16.00

фактически: 16.00

Газета выходит по субботам

Цена годовой подписки 88 руб.,
в розницу не распространяется

Издатель

Департамент внутренней политики ЯНАО
(629008, ЯНАО, г.Салехард,
пр-кт Молодёжи, д. 9, каб. 708)

Отпечатано в АНО «Ямал-Медиа»

Юридический адрес: 629003, Ямало-
Ненецкий автономный округ, г. Салехард,
мкр. Богдана Кнунянца, д. 1, каб. 106

Фактический адрес: 629007, Ямало-
Ненецкий автономный округ, г. Салехард,
ул. Чубынина, д. 39А

И.о. генерального
директора
АНО «Ямал-Медиа»
Каврук Татьяна
Ивановна

Главный редактор
Яковлева
Алина Кирилловна